

Generous anvers Savognin Pendicularas SA

Igl suveran digl cumejn da Surses ò concedia dus credits an ena somma da stgers en milliun francs. Approvada è er neida la lescha davart igl adiever da fis artificialas cun stritgier en artetg.

GION NUTEGN STGIER/FMR

Alla radunanza communal da glindesde seira è stada preschaintas 82 persungas cujl dretg da votar ed uscheia stgers 5% digl suveran digl cumejn da Surses. An tavla è er sto igl consentimaint da dus credits per realisar dus projects. Caschuno nignas discussiuns e nia approvo sainza cuntervuschs è igl credit d'investiziun da 240 000 francs per la renovaziun dalla centrala termoelectrica sen distanza tar la serenera a Cunter. Davart digl cumejn è neida preferida la varianta cun dus maschinas pi pitschnas anvezza d'ena maschina gronda. Tar revisiuns e disturbis pò cotras neir fatg adiever dalla sagonda maschina, uscheia tgi vo a perder nign gas da serenera.

Sanaziun ed angrondaneida dalla veia da gôt «Gôt Grond»

Igl 2020 è nia elaboro en studi per examinar l'equipaziun digl gôt aint igl territori tranter Tinizong e Savognin dalla vart sanestra dalla val. Las veias da gôt existentas èn strètgas e correspondan betg ple allas preteisas dad ozande. Da neir tiers alla lenna, da tagler chella ed er da manar davent ella è, ainten tschertas parts, tot oter tgi simpel. Planiso è da realisar ena colliaziun tg'è er carabla cun camiuns tranter la rezgia nova a Tinizong e l'antieriura rezgia a Savognin. Igl project cuntigna la construcziun d'ena nova punt (lenn e betun) sur la Gelgia aint igl territori dalla rezgia dalla Resurses SA a Tinizong. Pinavant la construcziun d'ena veia da gôt da radond 1,6 km dalla nova punt anfignen tar l'antieriura rezgia da Savognin aint igl territori da Sur Sarons.

La nova equipaziun corresponda ad ena veia da gôt tgi pussibilitescha da transportar tot la lenna sainza svideda anfignen tar la rezgia a Tinizong. La nova veia da gôt pussibilitescha igl access direct digl luvatori forestal a Tinizong agls gôts dalla flanca dalla val sanestra tranter Rona e Parsonz e facilitescha uscheia la lavour quotidiana digl menaschi forestal communal. Aint igl frataimp è igl project davant pi impurtant cun la realizaziun dalla nova rezgia Resurses SA a Tinizong.

Igl project vign realiso an dus etappas. Igl costs da chel project montan a 3,25 milliuns francs. Davart dalla confederaziun e digl cantun ins dastga chintar scu gio confirmo cun en sustign finanziar da 77%. Uscheia restan pigl cumejn da Surses anc l'investiziun da 750 000 francs. Las 82 persungas preschaintas on approvo igl credit cun 76:1 vuschs e 5 abstenziuns.



La prolungaziun digl contract d'amprest cun Savognin Pendicularas SA an connex cun la nova telecabina da Savognin a Tigignas è neida approvada.

FOTO MAO

Prolungaziun digl contract d'amprest da 2 milliuns francs

Igl 29 da matg 2018 ò la radunanza communal concedia alla Savognin Pendicularas SA en amprest sainza tschains da 2 milliuns francs an connex cun la construcziun dalla telecabina Savognin-Tigignas. Sa basond sen chel conclus è nia fixo en contract correspondent. Suandontas cundiziuns èn neidas fixadas aint igl contract d'amprest: la Savognin Pendicularas SA venda la sia part d'acziun dalla Surses Alpin SA anfignen igls 31 da december 2022 e restituescha igl amprest da 2 milliuns francs pigls 31 da december 2022 agl cumejn, u tg'ella tigna igl pachet d'acziun e restituescha igl import digl amprest an otra moda, u tg'igl cumejn da Surses surpeglia igl pachet d'acziun dalla Savognin Pendicularas SA anfignen igl pi tard la fegn 2022 pigl prietsch da stema respectivamaintg e maximalmointg 2 milliuns francs.

La situaziun actuala è la suandonta: anfignen igls 31 da december 2022 è igl amprest da 2 milliuns francs ni nia restitua ni tgi la Savognin Pendicularas SA vess pretendia tg'igl cumejn surpigless igl pachet d'acziun. Chegl per consequenza tgi la Surses Alpin SA è gio siva d'en taimp an tractativas concre-

tas cun en cumprader potenzial. Per differents muveivs tardeivan las tractativas da compra. Per aver taimp avonda per las tractativas e la vendita planisada dalla part d'acziun dalla Surses Alpin SA dumonda la societad acziunara dallas pendicularas da Savognin da prolungar igl termin per restitueir igl amprest per en onn. Alla proposta dalla suprastanza da sustigneir la dumonda da Savognin Pendicularas SA e da prolungar igl contract pigl amprest, sainza tschains, da 2 milliuns francs è nia detg EA e chegl unanim e sainza en sulet votum.

Ulteriuras decisius

- Pinavant ò igl suveran approvo en barat da taragn a Cunter, chegl tranter *Fredy von Büren* e la *Devonas Gips AG*.
- Votants e votantas on er accepto la nova lescha davart igl adiever da fis artificialas. La suprastanza na pò betg lubeir excepziuns. Igl suveran ò decidia da stritgier igl artetg, tgi vess previa tgi la suprastanza vess igl dretg da lubeir excepziuns per fis artificialas.
- Sot varia èn neidas varsaquantas dumondas pertutgont las lubientschas da carar sen las aclas, sen las alps e segl fons.

Maximal 4,95 milliuns francs

Dalla radunanza communal da glindesde seira ò *Leo Thomann*, igl mastral digl cumejn da Surses er infurmo scu tgi vo anavant cun l'arena da sport a La Nars. Uriundamaintg ò igl suveran gia delibero ena somma da 4,5 milliuns francs per chel project. Scu nia detg seia la carascheia da 10% deplorablamaintg betg stada menziunada explicitamaintg cun calcular igls costs. Chegl è er stada la raschung tgi votants e votantas da Surses on gia da decider sur d'en credit supplementar dad 1,1 milliuns, en credit tg'è nia refuso digl suveran digl cumejn da Surses. Damai vess igl center da sport a La Nars custo totalmointg 5,6 milliuns francs.

Lavours scumainzan la stad

Ossa cun eir danovamaintg sur igls codeschs e far l'egna u l'otra midada tigl project costa chel maximal 4,95 milliuns francs. Per spargner costs davainta igl nov biets 4 m pi curt. Cotras vignan l'ustareia, las gardarobas ed otras stanzas pi pitschnas. I dat pi pacas fanestras, igl biets vign betg construa schi ot e per chella raschung è pussebel da renunzger a rampas e scalems aint igl conturn. Tiers tgi la cuschna vigna pi pitschna e tigl material da construcziun vigna spargnea duess la qualitat betg neir alla curta, ò detg *Leo Thomann*. Cun las lavours da construcziun vign cuntinuo chesta stad, uscheia tgi igl antier biets vess d'esser pront per la nova staschung d'anviern 2023/24, schi pussebel gio all'antschatta da november 2023. Las lavours tgi stattan anc avant costan 2,3 milliuns francs. Vot deir tgi anfignen ossa ins ò investo pigl project La Nars (glatsch e deposits) 2,6 milliuns francs. Da preschaint ins saptga tgi detta ena fitg gronda carascheia, dantant seia chella risguardada aint igl nov project, ò punctuo *Leo Thomann*. I dovra er betg ple ena nova votaziun per terminar igl project digl center da sport La Nars. (fmr/gns)



Ena visualisaziun digl nov biets a La Nars, tgi sa disfranztescha betg fit digl biets uriund.

VISUALISAZIUN UFFER SA

An general cuntaints cun la staschung

Igl ustiers grischuns on gia, tiers la paca neiv, ena betg schi mala staschung. Chegl è nia alla gleisch tar la radunanza da delegos da Gastro Grischun da marde a Savognin. Personal qualifitgia mantga anc adegna ed igl madem sa mossa tigl cutier per ampluias dalla gastronomia.

GION NUTEGN STGIER/FMR

Gastro Grischun è l'unioniun tgi reunescha igls 998 ustiers digl noss cantun tgi dereivan da 16 sezziuns. Parsoura dall'associaziun tgi dat gio siva digl 1914 è siva digl 2015, *Franz Sepp Caluori* (Coira). El è er deuto dall'Allianza digl Center ed ò uscheia en bung feil er tar la politica e betg angal tar la branscha da gastronomia sezza. Magnafatschenta da Gastro Grischun è *Marc Tischhauser* (Domat). Sa radunos a Savognin èn 150 delegos, delegadas e giasts per salvar la 109avla radunanza da Gastro Grischun. Preschaintas èn er stadias ples persungas dalla politica, dall'economia e digl turissem. Represchento la regenza grischuna ò consiglier guvernativ *Marcus Caduff*. Gia li ò la radunanza agl «Jufa Hotel» ed igl giantar agl hotel Piz Mitgel.

Metter er igls ampluias pi ferm aint igl center

Per catar personal qualifitgia avonda exista nigra schliaziun ideala ò punctuo *Franz Sepp Caluori*. Er a curta vista existan nignas schliaziuns per migliurar la situaziun da persungas qualifiteidas. Ideias seian bagn avant mang, ma decisiv seia da realisar chellas e chegl an cuminanza, ò menziuno igl president da Gastro Grischun. D'augmentar l'attractivada scu patrunge



Er la politica è stada represchaintada alla radunanza da delegos. (da san.) *Leo Thomann*, mastral da Surses, consiglier guvernativ *Marcus Caduff*, *Tarzius Caviezel*, deuto e parsoura digl cunsegl grond scu er consigliera nazionala *Anna Giacometti*. FOTOS GION NUTEGN STGIER

seia igl nov marketing. Betg angal igl giast duess star aint igl center, mabagn er igls collaboratours e las collaboratouras, ò managea *Franz Sepp Caluori*. Augmentar la productivada cun nizigier las pussebladads dall'automatisaziun per pudeir porscher igl madem sarvetsch ed incantar igls giasts er cun pi pac personal. Sen scalem statal duessan pensiunos neir deliberos dalla taglia da gudogn, uscheia tgi stessan, aglmanc parzialmointg, anc a disposiziun ad ustiers e hoteliers scu ampluias. Bungas cundiziuns da basa per structuradas digl de favorevlas tg'èn disponiblas er la seira e la fegn d'emda mantgan. «Indispensablas èn er la modernisaziun e la flexibilisaziun dal-

las cundiziuns da basa digl dretg da luvra», ò detg *Franz Sepp Caluori*. Da promover seian er cooperativas per la construcziun d'abitaziuns, per tgi dess duple abitaziuns paiablas per personal ed er per indigens. Ultra da chegl vessigl d'esser pussebel da duvrar bagnas immobigliars nunutilisos ainten zonas d'industria per far or da chels abitaziuns per personal e per indigens, ò detg igl parsoura da Gastro Grischun. El è schizont nia concret e detg tgi chegl savessan esser biets communs veids, scolas e schizont hotels. Piglier an mang chegl seia angal pussebel an collaboraziun cun oters partenaris ed er cun otras branschas, ò managea *Franz Sepp Caluori*.



Franz Sepp Caluori, igl president da Gastro Grischun durant igl sies pled da bavegna.

ri. El ò er menziuno tgi la gastronomia grischuna dovra aint igl avigneir generalists e collaboratours e collaboratouras flexibels. Ultra da chegl savess er la gastronomia aint igl Grischun profitar da persungas tgi fon ena midada professunal, schinumnos «*Quereinsteigers*» u er da persungas tgi dereivan digl exterior e fetschan en amprendissadi scursania.

Ena ferma pitga

Leo Thomann, igl mastral digl cumejn da Surses ò purto igls saleids dalla populaziun all'antiera raspada radunada. An pled e maletg ò el preschento igl cumejn. A pled è er nia *Tarzius Caviezel*, igl president

digl cunsegl grond. La gastronomia grischuna seia d'immensa impurtanza pigl turissem, per l'economia ed er per l'identidad digl Grischun. El vegia grond respect digls bungas hospitants e dallas bungas hospitantas ed er da lour lavour, ò punctuo igl pi «ot» Grischun. La gastronomia seia er ena branscha represchaintada quasi ainten mintga vischnanca e chegl seia en fatg plaschevel. *Massimo Suter*, igl vicepresidente da Gastro Suisse ò detg tgi betg angal tar la gastronomia e la hotellaria mantga personal qualifitgia er an otras branschas seia chegl igl cass. Chegl er schi vigna pretendia davart dallas medias tgi chegl seia igl cass angal tar la gastronomia.

Gia ena bunga staschung

An discurs cun ples ustiers ed ustieras è sa musso tgi els ed ellas èn an general cuntaints cun la staschung d'anviern tgi sa catta ainten la fasa finala. Ins vegia bagn profito dalla paca neiv cun renunzger blers giasts agl eir cun skis e persiva eir orsoura a giantar u a tschagna. Er chegl tgi pertotga la consumaziun vegian igls giasts betg vurdò segl prietsch e pusto savens angal igl migler or dalla cuschna ed igl pi bung or digl schler. Plagn speranza èn ustiers ed ustieras er tgi detta ena bunga staschung da stad, schinavant tgi l'ora sa preschainta scu igls davos meis.